

Morning Dogri (NSD) National News Bulletin 02-09-2024

आकाशवाणी

- प्रधानमंत्री नरेन्द्र मोदी होरें आंध्रप्रदेश ते तेलंगाना दे मुखमंत्रिएं गी भरोसा दोआया ऐ जे उंदे राज्यें च बड़ी भारी बरखा करी बनी दी बिपदा आले हालात कन्नै निबड़ने च केन्द्र सरकार उनेंगी हर मुमकन मदाद उपलब्ध करोआग।
- भारती जनता पार्टी अज्जै थमां मुख भरै च अपना सदस्यता अभियान शुरू करै करदी ऐ।
- कोलकाता च महिला सखेत्ररू डाक्टर लेई न्यांह दी मंग गी लेइयै जंदी रातीं होए दे बरोध प्रदर्शनें च मन्ने परमन्ने दे बंगाली एक्टरें ते फिल्म उद्योग दिएं होरने हस्तिएं हिस्सा लैता।
- जंदे अगस्त म्हीने दरान मुख च 1 लख 75 ज्हार करोड़ रपे दा जीएसटी राजस्व हासल होआ ऐ जेहड़ा पिछले बरे दे अगस्त म्हीने कठेरे गेदे जीएसटी थमां कोई 10 फीसद मता ऐ।
- भारती पैरा एथलीट प्रीति पाल होरें महिलाएं दे 200 मीटर दे मकाबले च कैह दा तगमा जित्तियै पैरिस पैरालंपिक खेड्डें च भारत गी इक होर तगमा दोआई दित्ता ऐ।

<><><><><><>

PM-AP

प्रधानमंत्री नरेन्द्र मोदी होरें आंध्रप्रदेश ते तेलंगाना दे मुखमंत्रिएं गी अपने राज्यें च भारी बरखें कारण इस संकट कन्नै निबड़ने लेई केन्द्र सरकार आस्सेआ हर संभव मदाद देने दा आश्वासन दित्ता ऐ। अधिकारिएं दस्सेआ जे प्रधानमंत्री होरें भारी बरखें ते हाड़ गी दिक्खदे होई आंध्रप्रदेश दे मुखमंत्री एन.चन्द्रबाबू नायडू ते तेलंगाना दे मुखमंत्री ए.रेवानाथ रेड्डी हुंदे कन्नै फोन पर गल्ल कीती। कल हैदराबाद सनें तेलंगाना दे मते सारे हिस्सें च भारी बरखा बरी ऐ। इस करी तेलंगाना च अज्ज सब्बने प्राइमरी ते सकेँडरी स्कूलें गी बंद रखने लेई आखेआ गोआ ऐ। हैदराबाद दे जिला कलैक्टर ने विद्यार्थिएं दी सुरक्षा गी जकीनी बनाने लेई एतिहात दे तौर पर स्कूलें गी बंद रखने दी घोषणा कीती ऐ।

आंध्रप्रदेश च पिछले दऊं-चऊं दिनें च होई दी भारी बरखें कारण केई थाहरें खासतौर पर विजडवाड़ा ते एहदे कन्नै इलाके च जन जीवन प्रभावत होआ ऐ। उआं बरखें कारण प्रभावत 17 जहार लोके गी सुरक्षत कीता गेआ ऐ।

<><><><><><>

BJP Membership

भारती जनता पार्टी अज्जै थमां अपनी सदस्यता आला अभियान गी शुरू करा'रदी ऐ। इस अभियान दी शुरूआत प्रधानमंत्री नरेन्द्र मोदी होरें बीजेपी अध्यक्ष जे.पी.नड्डा थमां उंदी सदस्यता गी नमें सिरैया शुरू करने लेई प्रमाण पत्र देने कन्नै होग। मजूदा सब्बने सदस्ये गी अपनी सदस्यता नमें सिरैया शुरू करने दी लोड़ ऐ। बीजेपी मूजब हर 5एं-6एं ब'रें च सदस्यता अभियान नमें सिरैया चलाया जंदा ऐ। एह अभियान अज्जै थमां शुरू होइयै 10 नवम्बर तगर केई चरणे च चलाया जाग। इस अभियान तैहत पैहला चरण 25 सितम्बर गी समाप्त होग। व्यक्तिगत तौर पर मिस्ड कॉल राएं जां पार्टी दी वैबसाइट जां होर कोई डिजिटल प्लेटफार्मे पर साइन-अप कीता जाई सकदा ऐ।

<><><><><><>

President Mumbai

राष्ट्रपति द्रौपदी मुर्मू होर अज्जै थमां महाराष्ट्र दे त्रऊं दिनें दे दौरे पर होंगन। अपने दौरे दे पैहले दिन ओह कोल्हापुर दे वाराणा-नगर च श्री वाराणा महिला कोआपरेटिव ग्रुप दे गोल्डन जुबली आले समारोह च हिस्सा लेंगन। एहदे परेंत दुए ध्याड़े ओह पुणे च सिम्बीयॉसिस इंटरनेशनल डीम्ड यूनिवर्सिटी दे 21में दीक्षांत समारोह गी संबोधत करगंन। एहदे इलावा ओह मुंबई च महाराष्ट्र विधान परिषद दे शताब्दी ब'रे आले समारोह च बी शिरकत करगंन। अपने दौरे दे खीरले ध्याड़े ओह लातूर दे उदगीर च बुद्ध विहार दा उदघाटन करगंन ते कन्नै मुख्मंत्रि मांझी लाडकी बहन योजना दे लाभार्थिएं कन्नै गल्लबात बी करगंन।

<><><><><><>

President

राष्ट्रपति द्रौपदी मुर्मू होरें आखेआ ऐ जे अदालतें च बकाया पेदे मामलें गी घट्ट करना न्याऽपालिका लेई इक बड्डी चुनौती ऐ। अज्ज नमीं दिल्ली च राष्ट्री जिला न्याऽपालिका सम्मेलन गी संबोधित करदे होई राष्ट्रपति होरें आखेआ जे सब्बनें हितधारकें गी इकजुट होइयै बकाया मामलें दा हल तुप्पना लोड्चदा ऐ। केंद्री विधि ते न्याऽ मंत्री अर्जुन राम मेघवाल होरें इस मौके पर आखेआ जे न्याऽ प्रणाली दा इक खरा ते बधिया तंत्र आम लोकें लेई उपलब्ध होना लोड्चदा ऐ। भारत दे प्रधानमंत्री न्याऽधीश न्यायऽमूति धनंजय चंद्रचूड होरें आखेआ जे बकाया मामलें च कमी आहने लेई खडेरी गेदी कमेटी नै इनें मामलें दे हल लेई इक कार्ययोजना आहने दी रूप-रेखा तैयार कीती ऐ। प्रधान न्याऽधीश होरें आखेआ जे सर्वोच्च अदालतै हाल च गै अपनी पैहली राष्ट्री लोक अदालत संपन्न कीती ऐ। एहदे च लगभग 1 ज्हार मामलें गी कम्मकाज आले 5 ध्याड़े दे अंदर-अंदर आपसी सैहमति कन्नै नबेड़ी दित्ता गेआ।

<><><><><><>

Kolkata Protest

कोलकाता च पिछले म्हीने आर.जी.कर अस्पताल च महिला डाक्टर कन्नै दुष्कर्म ते हत्या दे मामले खलाफ बंगाली कलाकारें ते फिल्म इंडस्ट्री दे होरने मन्ने परमन्ने दे लोकें विरोध प्रदर्शन च हिस्सा लैता ते न्याय दी मंग कीती। शैहरे दे कालेज स्केयर च शुरू होई दी इक बड्डी रैली च कलाकारें ते मशूहर हस्तिएं जिंदे च अर्पना सेन, स्वास्तिका मुखर्जी, सुदिप्ता चक्रवर्ती, चेतती घोसाल, सोहनी सरकार ते होरने शामिल हे, जिनें सेंद्रल एविन्यू दे कन्नै-कन्नै मार्च करियै प्रशिक्षु डाक्टर गी न्याय देने दी मंग कीती। कलाकारें सनें प्रदर्शनकारिएं धरनें लाए ते अज्ज बडलै तगर विरोध प्रदर्शन आली थाहर पर मजूद रेह। उनें मंग कीती जे सत्ताधारी तृणमूल कांग्रेस दा कोई नुमायंदा जां प्रशासन थमां कोई बी उंदे कन्नै मलाटी करियै इस मामले च शामिल लोकें दी जांच ते गिरफ्तारी दी उंदी मंग गी तौले पूरा करै। प्रदर्शनकारिएं कोलकाता दे केई हिस्सें च मार्च करियै धरने लाए जिंदे च एसपलेडे ते जवाहरलाल नेहरू रोड- एस.एन.बनर्जी रोड बी शामिल ऐ।

<><><><><><>

GST-Collection

इस बरे दे अगस्त म्हीने दरान मुल्लख च 1 लक्ख 75 ज्हार करोड़ रपे दा जीएसटी राजस्व हासल होआ ऐ जेहड़ा पिछले बरे दे अगस्त म्हीने कठेरे गेदे 1 लक्ख 59 ज्हार करोड़ रपे दे जीएसटी कोला कोई 10 प्रतिशत मता ऐ। रिफंड जारी करने शा पैहले केन्द्र सरकारै 30 ज्हार 862 करोड़ रपे जदके राज्य सरकारें 38 ज्हार 411 करोड़ रपे दी जीएसटी कठेरेया ऐ। बक्ख-बक्ख आयातें ते अंतर राज्य बिक्रिए पर संगठित जीएसटी 93 ज्हार 621 करोड़ रपे कठेरेया गेआ ऐ। घरेलू लैन-देन थमां हासल कुल जीएसटी राजस्व 9.2 प्रतिशत बधियै 1 लक्ख 25 ज्हार करोड़ रपे होई गेआ ऐ। पिछले बरे दे आंकड़ें दे मकाबले माल-समेयान दे आयात थमां हासल राजस्व 12.1 प्रतिशत बधियै 49 ज्हार 976 करोड़ रपे होई गेआ ऐ। अगस्त तगर हासल शुद्ध जीएसटी राजस्व 8 लक्ख 7 ज्हार करोड़ रपे हा जेहड़ा पिछले बरे थमां 10.2 प्रतिशत मता ऐ।

<><><><><><>

BJP Star Campaign

जम्मू-कश्मीर च भाजा दे चुनां प्रचार गी बढ़ावा देने ताई प्रधानमंत्री नरेंद्र मोदी, अमित शाह ते पार्टी दे होर दुए वरिष्ठ मंत्री 8 सितंबर थमां केंद्र शासित प्रदेश पुज्जने आहले न। भारतीय जनता पार्टी दे इक सीनियर लीडर नै दस्सेया जे प्रधानमंत्री मोदी दुए गेड़ दौरान प्रचार ताई जम्मू-कश्मीर आई सकदे न, पर होर दुए मंत्री पक्के तौरा पर 10 सितंबर थमां जम्मू-कश्मीर दा दौरा लाडन। मेद ऐ जे प्रधानमंत्री नरेंद्र मोदी जम्मू-कश्मीर च दऊं रैलियें गी संबोधित करडन, रैलियें दियें तरीखें गी मुक्कदा रूप दित्ता जा'रदा ऐ।

<><><><><><>

PM Condolence

प्रधानमंत्री नरेन्द्र मोदी होरें वरिष्ठ पत्रकार ते साहित्यकार उमेश उपाध्याय हुंदे निधन पर शोक जताया ऐ। इक सोशल मीडिया पोस्ट च श्री मोदी होरें आखेआ जे वरिष्ठ पत्रकार हुंदा निधन पत्रकारिता दी दुनिया लेई इक अपूरणीय क्षति ऐ। मोदी होरें इस दुख दी घड़ी च उंदे परोआर कन्नै संवेदना जताई। दक्खन दिल्ली दे बसंत कुंज इलाके च इक अंडर कंस्ट्रक्शन इमारत दी चौथी मंजिल थमां डिग्गने करी उमेश उपाध्याय हुंदी मौत होई गई।

पुलस नै दस्सेआ जे उमेश उपाध्याय अपने घरै दी मरम्मत दे कम्म दा निरीक्षण करा'रदे हे, जिसलै ओह् चानचक्क गै गल्ली कन्नै चौथी मंजिल थमां डिग्गी गे ते उंदे सिरै पर सट्ट लग्गी। उनेंगी अस्पताल पजाया गेआ जित्थें उनेंगी मृतक घोषत कीता गेआ।

<><><><><><>

Mumbai Accident

महाराष्ट्र च मुंबई कोल चैमूर इलाके च इक कार दे शिडके पर खड़ोते दे ट्रक कन्नै होई दी टक्कर कारण 3 लोकें दी मौत होई गई ते 3 होर जख्मी होई गे। एह हादसा उसलै पेश आया जिसलै कार नै शिडकै पर खड़ोते दे ट्रक गी जाई टक्कर तारी। जांच च दस्सेआ जा करदा ऐ जे कार नै काबू मुहाई दित्ता ते तेज रफ्तार कारण सिद्धे ट्रक कन्नै जाई बज्जी। पुलस दा आखना ऐ जे हादसा दपैहरी 2 बजे पेश आया ते जख्मिं गी नेड्मे अस्पताल च दाखल कराया गेआ।

<><><><><><>

Paraolympic

पैरिस च होआ'रदी पैरालंपिक खेड्डें च भारतीय पैरा खडारी प्रिति पाल होरें इक होर तगमा भारत दे नां कीता ऐ। उनें महिलाएं दी 200 मीटर 7.35 दे फाइनल च कैह् दा तगमा जित्तेआ। इस जित्त कन्नै ओह् भारत दी पैहली ऐसी महिला ट्रेक एंड फील्ड पैरा एथलीट बनी गेइयां न जिनें इक्के पैरालंपिक खेड्डें च दो तगमे जित्ते न। उआं भारतीय खडारी निशाद कुमार होरें बी मर्दे दे हाई जंप टी-47 इवेंट च 2.04 मीटर कन्नै चांदी दा तगमा अपने नां कीता। पैरिस पैरालंपिक 2024 दे 5में रोज भारतीय खडारिं थमां होर मते तगमे जित्तने दी मेद बुज्जी जा'रदी ऐ। पैरा तीरंदाज शीतल देवी ते राकेश कुमार बी मिक्सड कंपाउंड ओपन सेक्शन प्रतियोगिता लेई मैदान च उतरंगन। उआं पैरालंपिक च भारत आस्तै अज्ज सब्बै मैच तगमे आले मैच न। पैरा बैडमिंटन च बक्ख-बक्ख मकाबलें च अज्ज भारत कोल 5 मैडल जित्ती सकने दा मौका होग।

उआं विश्व रिकार्ड बनाई चुकी दी दीपथी जीवानजी बी अज्ज 400 मीटर टी-20 च अपना दमखम दस्सने लेई मैदान च होग ते टोक्यो पैरालंपिक च सुन्ने दा तगमा जित्ती चुके दे सुमित अंतिल बी भाला सुट्टने आले एफ-64 मकाबले च अपने खिताब गी बरकरार रखने आस्तै मैदान च उतरगंन।

<><><><><><>